



29. oktober 2020
Atassut

UKA 2020/14
Aqqalu C. Jerimiassen

Nunanut Allanut tunngasutigut naalackersuinikkut ingerlatsineq pillugu nassuiaat 2020

(Nunanut Allanut Nukissiuuteqarnermullu Naalackersuisoq)

Ilinniarsimasunik nunarput amingaateqartuartoq taakkartorneqartuartarpoq, sulilu ilinniangaqassutsikkut qaffasinnerungaartumik inuiaqatigiittut inissisimanissarput suaarutigineqartuarluni oqartussanit.

Nunanut allanut Nukissiuuteqarnermullu Naalackersuisoq aallaqqaammut Atassummiit pilluaqqoqqaarumavarput angusaanut kusanartumut, naak illuatungiliuttuungaluaanniluunniit nunarput pillugu sulingatta angusaqarluartoqartillugu nersualaarissalluta pisussaaffeqaratta. Tassalu Pituffimmut tunngatillugu angusaanut, taannalu pillugu Atassummiik oqariiginnarsinnaavugut, angusaq iluarisimaarluinnaratsigu. Torrak!

Nunarsuarmioqataanitta aqqani maanna Nunanut allanut naalackersuisoqarnitta malunnaatilimmik nunarput avammut nittarsanneqarnerani, nunanillu allanik suleqateqarnermi erseqqarissumik saqqummertarnera iluarisimaarparputtaa.

Issittulerngusaanneq aatsaat taama nunarsuarmioqatitta akornganni soqutiginaartigilerpoq, iluameersunillu ileqarnissarput pingaarnepaaffissaminiileqqalluni, ullut tallimat qaangiuppata sorliungaluarnersoq USA-mi præidentinngoriarpat sorliunera apeqputaatinnikkaluarlugu suleqatigiinnerup issittumi illersornissakkut inissisimajuarnissaa Atassummiik kaammattuutingaarput. Taamaattorli USA-p nunatsinni nammineq suliaqarnissamini aningaasaliilluni paasissutissanik assigiinngitsunik qulaajaasinnaanissaminut akuerineqarnera arlalitsigut Atassummiit iuminaatsissinnaasimagatsigu, nunatummi paasissutissaatitsinnik akuerisamik paasissutissanik nunap isertungaataanik annissuiniarnertut nalilersimagatsigu, naalagaaffeqatigiinnerullu iluani ulorianaateqapajaarsinnaasutut nalilerlugu.

Taamaattorli minikkusunngeqaarpullu taassallugu, Asiap kangiani sinniisoqarfeqalernissamik siunnersuuteqartoqarsimanera Atassummiit iluarisimaarluutiguttaa taperseratsigu, siunissamilu suli annertunerujartortumik Asiap kangiani niuernikkut ineriartortoqarluarsinnaanera upperalutigu Covid – 19 qaangiuteriarpat.

Nualluussuup ukioq manna unammillernartumik inissisimaffiani Atassummiit Nunanut allanut Naalackersuisoq kaammattorumavarput sorpassuit assigiinngitsut niuernikkut nunanut allanut isumaqatigiissutaasut annaanaversaarneqarnissaannik, naak sorpassuisuit aningaasarsiornikkut unammillernartorpassuarnik nalaataqarfiungaluartut, pingaartuuvoq attaveqaatit nunani allaniittut annaanngilluinnarissaat.



Issittumi sillimaniarneq illersornissarlu sakkortunerpaaffimminiilli! Ilaatigut taajorneqartarpoq issittumi sakkulersorfiunngilluinnassasoq, taamaattorli illuanik Atassummiik isumaqarpugut, nunat naakkittaattut nunapiluunersuarput inukitsunnguaq assut soqutigaat, taamaattumillu sillimaniarnikkut illersornissakkullu sutigut tamatigut pitsaanerpaamik inissisimasariaqarpugut, tassanilu naalagaaffeqatitta annertuumik suleqatigilluarnissaa avaaqqunneqarsinnaanngilluinnarluni.

Nunanut allanut Naalackersuisoq maannangaaq piffissaatillugu Atassummiik kaammattorumavarput, sullualuk pillugu piffissaalluarallartillugu nunanut sanilitsinnut piaartumik isumaqatigiissuteqaateqarfiginiartariaqaraa, sutigullu nunatta siunissaq ungasinnerusoq isigalugu inuussutissarsiornikkut isertitaqaatitut atulersinnaaneraa suliarilluakkamik naalagaaffeqatigut peqatingalugit periusissioqqullugu.

Kunneqarfiup Issittoq pillugu periusissiaa suliarineqartoq naluneqanngilaq, taammaattorli uani immikkut Sullualuk eqqumaffigineqartariaqarluinnartoq Atassummiik isumaqaratta, taanna immikkut suliarineqarnissaa qulaajarluakkamik kaammattuutingaarput.

EU-mik annertuumik suleqateqartuarnissaa pisariaqartuusoq Atassummiit isumaqarpugut, uanilu immikkut annertuumik eqqumaffigeqquaguttaaq Naalackersuisut, OLT-tut inissisimanitsinni periarfissaq suli atorluarnerusariaqartoq, sorpassuillu ilinniartitaanikkut atuarfeqarnikkullu suli inerisaaffigilluaqqissinnaasagut EU-mi nunat ilaasortat nunasiaateqarsimasut aningaasaqarnikkut tapersiissuteqartarnerannut nunarput pissarsiaqarneroqqinniarsinnaasoq sukataarutigilluaqqullugu.

Immikkuttaarlu Atassummiik Brexit eqqarsaatingalugu, nunatta EU-mut ilaasortaannginnera atorluarluttaaq immikkorluinnaq ilusilimmik kiffaannngissuseqartumik Tuluit nunaannut niueqatigiinnikkut isumaqatigiissuteqarfigineqaaqqissinnaanera periarfissaqarluartoq ilimangaarput. Ajoqutaasinnaasorpasuit taakkartorneqarput Tuluit EU-mik aninerat pillugu, taamaattorli uagut nunatut suna tassani iluaqutissarsiffigisinnaaneripput ujartungassaqqippoq soqutiginaatilik.

Taamatut Atassummiik oqaaseqarluta Nunanut allanut Naalackersuisup ukioq 2020-imut saqqummiussisutaa tusaatissatut tiguarput, sulilluaqqinnissaanillu kissaalluguttaaq.